

Xaneiro 2018.



O xerente de Gran Vía, Andrea Nóvoa, Natalia Rey e Laura González e o vicerreitor de Relacións Internacionais

TRES EXPEDIENTES EXCELENTES QUE SE CONVERTEN NUNHA AXUDA DE 1000 PARA A ESTADÍA ERASMUS

Duvi | Vigo

Ter un expediente académico excelente serviulles a Andrea Nóvoa, Laura González e Natalia Rey para que a súa estadía no estranxeiro cunha bolsa Erasmus sexa máis desafogada economicamente. Grazas ás súas cualificacións foron seleccionadas na convocatoria de bolsas Erasmus+ Gran Vía, unha iniciativa posta en marcha por este centro comercial, en colaboración coa Universidade de Vigo. O obxectivo é ofrecer unha axuda adicional ao alumnado que completa os seus estudos no estranxeiro baixo o paraugas do programa Erasmus+, [+info](#)



O presidente de ESN Vigo, Iago Bastos, no centro, xunto con outros membros da asociación

ESN VIGO ARRANCA 2018 ULTIMANDO OD PREPARATIVOS PARA A CHEGADA DO NOVO ALUMNADO INTERNACIONAL

Duvi | Vigo

Unha experiencia inesquecible como estudantes Erasmus e moitas gañas de axudar ás novas xeracións de alumnado de intercambio son os trazos que comparten as case 30 persoas que forman parte de ESN Vigo, asociación que dende o 2009 traballa a nivel local pola integración das mozas e mozos estranxeiros que cada ano veñen á Universidade. Despois dun outono repleto de viaxes, festas e actividades, esta asociación prepárase para comezar o segundo cuadrimestre cunha axenda tan completa como a do 2017 [+info](#)

OCEANS OF PLASTICS ACHEGA Á SOCIEDADE AS INVESTIGACIÓNS SOBRE O IMPACTO DOS PLÁSTICOS NO MEDIO MARIÑO

Duvi | Vigo

Oceans of Plastics arrancou hai un ano da man de Campus do Mar e a Fundación Española para la Ciencia y la Tecnología co obxectivo de informar e alertar á sociedade sobre o uso excesivo de plásticos e o impacto que este tipo de residuos teñen no medio mariño. Para iso, traballaron en colaboración cos grupos de investigación da Universidade de Vigo e do Instituto Español de Oceanografía para seleccionar os contidos de maior relevancia en relación con este eido e convertelos en recursos gráficos de carácter divulgativo. Agora, na parte final do proxecto, estase a comezar coa difusión destes contidos divulgativos a través de redes sociais e [+info](#)



O proxecto céntrase en converter os resultados dos grupos de I+D en recursos gráficos sobre o uso excesivo a contaminación que producen os plásticos



A cita estará vinculada ao proxecto de especialización do Campus da Auga. Imaxe da celebración da primeira edición en 2017

OURENSE ACOLLERÁ EN ABRIL O II CONGRESO EUROAMERICANO DE DEREITO E POLÍTICA

Duvi | Ourense

O campus de Ourense acollerá do 17 ao 19 de abril o II Congreso Euroamericano de Dereito e Política, organizado pola Área de Ciencia Política e da Administración da Universidade de Vigo en co-organización co Programa de Pós-Graduação em Justiça Administrativa da Universidade Federal Fluminense de Río de Janeiro, en Brasil. Nesta segunda edición, a cita vincularase ao proxecto de especialización do campus de Ourense como Campus da Auga, centrando o seu interese no desenvolvemento sostible. [+Info](#)



A exposición está impulsada pola Unidade de Igualdade da Universidade de Vigo, o Campus do Mar e a Deputación de Pontevedra

CHEGA A VIGO A EXPOSICIÓN QUE PON EN VALOR O INVISIBILIZADO SABER DAS MULLERES DO MAR

Duvi | Vigo

Tras o seu paso pola Facultade de Ciencias da Educación do campus de Pontevedra este mércores chegou a Vigo a exposición Sustentabilidade en feminino: achegas das mulleres á sustentabilidade do mar, unha mostra composta por 28 paneis nos que se amosa unha escolma de fotografías que, desde 1917 ata a actualidade, poñen rostro a múltiples mulleres que traballaron e traballan en diferentes sectores vinculados co mar. O obxectivo: visibilizar o seu papel e a súa contribución á economía do mar, poñendo en valor o traballo que as mulleres desenvolveron ao longo dos séculos en relación co mundo marítimo e promovendo a igualdade e a acción positiva entre as e os futuros profesionais e científicos. [+info](#)



A través dos abonos Mover e Ponte en forma tense acceso ás instalacións e ás actividades

CHAN PELVIANO E DEFENSA PERSOAL FEMININA, NOVIDADES NA PROGRAMACIÓN DEPORTIVA PARA O SEGUNDO CUADRIMESTRE

Duvi | Vigo

Tras os excesos do Nadal é tempo de regresar á rutina e de retomar hábitos de vida saudables. Para iso, a Área de Benestar, Saúde e Deporte retoma tamén o seu pulo normal de actividades e abre a matrícula para a programación deportiva do segundo cuadrimestre, que comeza o vindeiro 22 de xaneiro. As dúas vías principais para a práctica deportiva no campus vigués seguirán a ser os abonos Mover e Ponte en Forma, a través dos que se artellan os accesos ás instalacións, a participación en actividades e os descontos en programas deportivos e lúdicos. As e os abonados a calquera destas dúas tarxetas teñen tamén acceso ás actividades dirixidas. [+info](#)



Cada páxina da a coñecer traballos de grupos de investigación con perspectiva de xénero

DOCE MESES PARA VISIBILIZAR OS PROXECTOS DE INVESTIGACIÓN “QUE PARTEN DUNHA EPISTEMOLOXÍA FEMINISTA”

M. Del Río | Vigo

Precursoras da ciencia, referentes da historia, pioneiras no eido universitario, artistas galegas contemporáneas, en definitiva, mulleres salientables nos seus eidos de traballo veñen protagonizando os calendarios que a Unidade de Igualdade edita cada ano. Pero para este 2018 os nomes propios de muller deixan paso aos equipos e grupos da Universidade de Vigo que apostan pola perspectiva de xénero no seus estudos e proxectos. [+info](#)

3


A NOVA XEIRA DOS MARTES SAUDABLES DEDICARÁ ESPECIAL ATENCIÓN Á NUTRICIÓN

Rosa Tedín | Ourense

Primeiro foi a enfermaría, logo o deporte e este cuadrimestre a temática elixida será a nutrición. Os postos dos Martes Saudables comezarán o 20 de febreiro a percorrer de novo os tres campus da Universidade de Vigo co obxectivo de fomentar entre alumnado, persoal docente e investigador e persoal de administración e servizos os bos hábitos nos diferentes aspectos da vida, desde a saúde física á emocional. [+info](#)



Alumna realizando unha proba nun dos postos dos Martes Saudables



ÚLTIMOS DÍAS PARA PRESENTARSE AO CONCURSO SOBRE O PAPEL DA MULLER NA CIENCIA

Duvi | Ourense

A segunda edición do Concurso Escolar de Debuxo e Redacción do Día Internacional da Muller e a Nena na Ciencia está a piques de pechar o prazo para a presentación de propostas. O alumnado de Primaria e Secundaria da provincia de Ourense interesado en presentar os seus debuxos e redaccións a esta iniciativa pode facelo ata o luns 15 de xaneiro ás 14.30 h. O certame está organizado polos centros da área científica-tecnolóxica do campus de Ourense no marcos dos actos do da 11 de febreiro, Día Internacional da Muller e a Nena na Ciencia. [+ info](#)



O proxecto celebrou en Vigo a súa reunión de lanzamento

VIGO LIDERA UN PROXECTO EUROPEO DE CASE UN MILLÓN DE EUROS PARA FORTALECER A XESTIÓN DAS UNIVERSIDADES MARROQUÍIS

M^a del Carmen Echevarría | Vigo

A rendición de contas por parte das institucións públicas precisa da existencia e correcto funcionamento nestas entidades de estruturas e ferramentas que permitan facer un seguimento de como se gastan os cartos que a sociedade inviste nelas. Se nas universidades públicas europeas o control interno e a realización de auditorías son prácticas inherentes ao seu funcionamento, isto non sempre sucede nas institucións de educación superior de fóra da UE. Co obxectivo de fortalecer a gobernanza nas universidades marroquís. [+info](#)



Dúas participantes na primeira quenda do programa

10 SEMANAS PARA MELLORAR A CONDICIÓ FÍSICA DO ALUMNADO MÁIS SEDENTARIO

Duvi | Vigo

Acadar que o alumnado que non realiza actividade física adopte un estilo de vida máis saudable, ademais de mellorar a súa condición física e a súa calidade de vida, son os obxectivos do programa Active Campus Europe, que promove a Área de Benestar, Saúde e Deporte da Universidade de Vigo, xunto con outras 15 institucións académicas europeas. Seguindo as recomendacións da Organización Mundial da Saúde, o programa persegue que cada unha e cada un dos participantes adquira o hábito de realizar un mínimo de 30 minutos de actividade física, cinco días á semana, ata acadar os 150 minutos semanais. [+info](#)




O seu obxectivo é fomentar as vocacións científicas entre as futuras xeracións

O CAMPUS ACOLLERÁ O 16 DE FEBREIRO A I XORNADA DE DIVULGACIÓN EN CIENCIA, TECNOLOXÍA, ENXEÑARÍA E MATEMÁTICAS

Duvi | Ourense

Co gallo da conmemoración o día 11 de febreiro do Día Internacional da Muller e da Nena na Ciencia, a Facultade de Ciencias, a Escola Superior de Enxeñaría Informática e a Escola de Enxeñaría Aeronáutica e do Espazo do campus de Ourense están a desenvolver unha serie de actividades que pretenden fomentar a vocación científica e tecnolóxica entre as futuras xeracións, especialmente entre as nenas e as adolescentes. No marco desta programación, o día 16 de febreiro os tres centros celebrarán a I Xornada de Divulgación en Ciencia, Tecnoloxía, Enxeñaría e Matemáticas. [+info](#)



Durante dúas semanas, poderase acceder de xeito gratuito ás actividades dirixidas



Eva Monroy desenvolveu unha intervención artística neste espazo hospitalario



DIFERENTES OPCIÓNS PARA INICIAR O ANO EN MOVEMENTO

Duvi | Pontevedra

A chegada dun novo ano e dun novo cuadrimestre constitúen tamén unha boa oportunidade para poñer en movemento á comunidade universitaria e, con ese propósito, a Área de Benestar, Saúde e Deporte da Universidade mantén aberta a inscrición nos abonos que permiten, no campus pontevedrés, facer uso da sala de cardio-fitness do Pavillón Universitario e participar nas diferentes actividades dirixidas que promoven nestas instalacións. Co obxectivo de dar a coñecer os seus servizos, a área promove dúas semanas promocionais gratuítas, entre o vindeiro luns 22 e o 4 de febreiro, para toda a comunidade universitaria. [+info](#)

BELAS ARTES ACHEGA A NATUREZA A UNIDADE DE COIDADOS PALIATIVOS DO MEIXOEIRO

Eduardo Muñiz | Pontevedra

Achegar a natureza ás salas e corredores da Unidade de Coidados Paliativos do Hospital Meixoeiro de Vigo foi a premisa que a artista e alumna de doutoramento da Facultade de Belas Artes Eva Monroy empregou como punto de partida para a intervención artística que desenvolveu para este espazo hospitalario. Partindo dunha selección de dez árbores representativas da paisaxe galega e inspirándose nos debuxos científicos naturalistas, Monroy achegou aos corredores e as salas de reunións e familiares desta planta unha proposta artística xurdida das reunións e das necesidades expostas polo persoal deste centro hospitalario. [+info](#)

AMPLÍASE ATA O 31 DE XANEIRO O PRAZO DE PRESENTACIÓN DE CANDIDATURAS AOS PREMIOS INCUVI-EMPRENDE

Duvi | Vigo

O prazo de presentación de proxectos para a sétima edición dos Premios Incuvi-Emprende amplíase ata o día 31 deste mes de xaneiro. Deste xeito, estudantes e egresados recentes poderán entregar os seus proxectos emprendedores ao longo de todo este mes, co obxectivo de que as súas ideas ser tornen, tras un ano de traballo e formación, nun proxecto empresarial real. [+info](#)



Os resultados empregaranse no deseño dun programa piloto para reducir esta porcentaxe. Na imaxe Laura Ruiz nun posto dos Martes Saudables



Estas achegas excesivas de nutrientes acaban degradando os ecosistemas e provocando en casos extremos a súa desaparición



Eva Monroy desenvolveu unha intervención artística neste espazo hospitalario

O 20% DO ALUMNADO DO CAMPUS PRESENTA UNHA CONDUTA SEDENTARIA

Rosa Tedín | Ourense

“O 20,6% do alumnado do campus de Ourense presenta unha conduta sedentaria, sen existir diferenzas significativas entre mulleres e homes”. Esta é unha das principais conclusións dun estudo realizado pola investigadora predoutoral da Universidade de Vigo Laura Ruiz. Os resultados obtidos neste traballo serán empregados para o deseño e implementación dun programa piloto que permita reducir esta incidencia na comunidade universitaria.

UN ESTUDO ANALIZA COMO AFECTA O EXCESO DE NITRÓXENO PROCEDENTE DA ACTIVIDADE HUMANA ÁS PRADERÍAS MARIÑAS GALEGAS


Duvi | Vigo

A eutrofización é a acumulación de residuos orgánicos no litoral mariño, que causa unha fertilización excesiva e xera a proliferación de organismos fotosintéticos cuxa descomposición provoca déficit de osíxeno e incremento da turbidez. As consecuencias deste proceso pasan por unha redución da diversidade biolóxica e a degradación de ecosistemas como as praderías mariñas dos estuarios galegos. A tese de doutoramento de Marta Román, dirixida polos profesores Gonzalo Méndez e Emilio Fernández, céntrase precisamente en analizar os efectos do proceso de eutrofización sobre este tipo de hábitats mariños [+info](#)

A ASOCIACIÓN DMD AFONDA NO CAMPUS NAS CLAVES DO TESTAMENTO VITAL

Eduardo Muñiz | Pontevedra

No ano 2015, o pleno do Parlamento de Galicia aprobou por unanimidade a lei 5/2015 de dereitos e garantías das persoas enfermas terminais, no que se regula o dereito das persoas a deixar constancia no chamado documento de instrucións previas ou testamento vital cal é a súa vontade respecto das actuacións médicas que poderían realizarse no caso dunha enfermidade terminal, como manter a respiración asistida, alimentación a través dunha sonda nasogástrica... Co propósito de dar a coñecer este documento e o procedemento a través do que se realiza, a asociación Dereito a Morrer Dignamente (DMD) protagonizou este xoves un coloquio na Escola de Enxeñaría Forestal, que se enmarca nas actividades do Programa Universitario para Maiores no campus de Pontevedra. [+info](#)



A actividade é a primeira que se organiza no marco da rede Aqua-Cibus

CIENCIAS ACOLLERÁ UN CICLO DE CONFERENCIAS SOBRE ACUICULTURA E TOXINAS

Duvi | Ourense

Recentemente o Cento de Investigacións Agro-Ambientais e Alimentarias (Cia3) da Universidade de Vigo, coordinado polo catedrático Jesús Simal, presentou a súa rede Aqua-Cibus, destinada a promover unha acuicultura de calidade, competitiva e sostible en Iberoamérica. A primeira actividade desta iniciativa, financiada polo Programa Iberoamericano de Ciencia y Tecnología para el Desarrollo Cyted, será a celebración dun ciclo de conferencias sobre acuicultura e toxinas na Facultade de Ciencias do campus de Ourense. [+info](#)

7



A desigualdade de xénero no estado contemporáneo, a través da ollada de 23 especialistas

UN LIBRO E 23 ESPECIALISTAS PARA EVIDENCIAR A DESIGUALDADE DE XÉNERO NO ESTADO CONTEMPORÁNEO

Rosa Tedín | Ourense

Plasmar como a igualdade formal entre homes e mulleres non se traduce nunha igualdade real entre homes e mulleres para avanzar na súa consecución. Con este reto, este luns presentouse na Facultade de Dereito do campus de Ourense o libro electrónico *Mujer, Política e Igualdad. De las palabras a los hechos*. Nel recóllense as actas das XII Xornadas Sociedade e Dereito, celebradas neste mesmo centro do 28 de marzo ao 5 de abril de 2016 coa participación de 23 especialistas do ámbito político, social, cultural e académico. [+info](#)



Mussa Juane e Marta Pereira son as comisarias desta exposición

SETE XEITOS DE ENTENDER A FOTOGRAFÍA, REUNIDOS NA CASA DAS CAMPÁS

Eduardo Muñiz | Pontevedra

Da fotografía analóxica en branco e negro ao *collage* nacido do traballo con fotografías apropiadas, pasando por traballos de fotografía dixital ou por intervencións pictóricas sobre a imaxe. A expoición *Atelier f22* reúne deste luns na Casa das Campás sete xeitos de abordar e traballar con esta técnica, pertencentes a sete artistas formados ou que se están a formar na Facultade de Belas Artes. Dúas alumnas deste centro, Sol Mussa Juane e Marta Pereira, son as comisarias dunha exposición que impulsaron como traballo para a materia *Xestión, ámbitos artísticos e mundo profesional*, que imparte o profesor Xosé Manuel Buxán. [+info](#)



O reitor da Universidade de Vigo incidiu na importancia do congreso

O INTERNATIONAL SYMPOSIUM ON MARINE SCIENCES CONVERTERÁ VIGO ESTE VERÁN NA CAPITAL MUNDIAL DAS CIENCIAS MARIÑAS

M^a del Carmen Echevarría | Vigo

O Seminario Ibérico de Química Mariña, o Encontro de Oceanografía Física, a Reunión Ibérica de Fitoplancto Tóxico, a International Science Conference do Campus do Mar, o Workshop Patrimonio Cíes o propio Internacional Symposium on Marine Science, ISMS 2018, reunirán en Vigo, entre os días 20 ao 22 de xuño, a preto de 400 participantes, co obxectivo de aglutinar todo o coñecemento científico de interese internacional no ámbito das ciencias mariñas. A sexta edición do ISMS, que tamén servirá ao estudantado de grao, mestrado e doutoramento para expoñer os seus primeiros traballos científicos. [+info](#)

8



Este mércores celebrouse unha presentación da convocatoria deste curso

OS PREMIOS INCUVI-EMPRENDE AMOSAN NO CAMPUS AS VENTÁIS DE OPORTUNIDADE QUE ABREN A ALUMNADO E EGRESADOS

Rosa Tedín | Ourense

Ata o día 31 de xaneiro está aberto o prazo de presentación da sétima edición dos Premios Incuvi-Emprende da Universidade de Vigo, destinados a fomentar o espírito emprendedor entre alumnado e persoas egresadas. Para dar a coñecer as características desta iniciativa, que beneficiará a catro proxectos no campus de Ourense, dous no de Pontevedra e seis no de Vigo, este mércores celebrouse unha sesión informativa no edificio Politécnico. [+info](#)



O CAMPUS IMPULSA UNHA NOVA RECOLLIDA DE APARELLOS ELÉCTRICOS E ELECTRÓNICOS

Eduardo Muñiz | Pontevedra

Todos aqueles equipamentos e electrodomésticos que funcionan con electricidade ou con pilas e baterías rematarán por converterse nalgún momento nun RAEE, nun residuo de aparellos eléctricos e electrónicos que, polo seu carácter contaminante, non pode rematar no colector do lixo, xa que esixen un tratamento específico. Co propósito de concienciar á comunidade universitaria respecto desta cuestión e contribuír á vez á correcta xestión destes materiais, a Vicerreitoría promove, dentro do proxecto Green Campus, a VI Semana de Recollida de RAEEs, para a que se instalarán unha serie de puntos de recollida nos diferentes centros do campus, que permanecerán operativos entre o luns 29 de xaneiro e o venres 2 de febreiro. [+info](#)



Fotos das diferentes gañadoras dos Premios Egeria desta edición

BRUXAS SEN CLIXÉS QUE NON CONSUMEN MEDIOS DE COMUNICACIÓN E NON MERCAN MODA INFANTIL

Eva M. Porto | Vigo

O acoso sexual na contorna universitaria, a influencia dos estereotipos á hora de tomar decisións educativas, a análise dos clixés na música emitida pola emisora 40 Principales no 2016, xunto co exame das protagonistas da serie *Girls* de HBO, a construción de roles dende a moda infantil e a crítica cara os tópicos formados arredor das meigas son os argumentos dos proxectos galardoados nos IV Premios Egeria á inclusión da perspectiva de xénero nos traballos de fin de grao e de máster na Universidade de Vigo. As seis gañadoras recolleran os galardóns o vindeiro luns no acto académico da festividade de San Tomé de Aquino. [+info](#)

9



A londra na lagoa da Facultade de Filoloxía e Tradución

A OMA CONFIRMA A PRESENZA ESTABLE DUNHA LONDRA NO CAMPUS

Duvi | Vigo

Entre o olor a terra mollada e o rumor das árbores, a londra emerxe na lagoa da Facultade de Filoloxía e Tradución, un ecosistema especialmente favorecido polas últimas choivas. A presenza deste mustélido do campus vén de confirmarse nos últimos días, aínda que non é unha sorpresa para os técnicos de medio ambiente da Universidade. “O ano pasado pensábase que podería haber londras porque observamos algunhas pegadas, pero agora xa o confirmamos ao ver o animal”, indica Sergio Ramos, técnico superior da Oficina de Medio Ambiente, que explica que posiblemente este exemplar marchase do campus pola seca e que agora regresa a estas augas polas intensas precipitacións das últimas semanas. [+ info](#)



Docentes do Programa para Maiores especialízanse na formación dun alumnado moi motivado, implicado e participativo

DOCENTES DO PROGRAMA PARA MAIORES ESPECIALÍZANSE NA FORMACIÓN DUN ALUMNADO ALTAMENTE “MOTIVADO, IMPLICADO E PARTICIPATIVO”

M. Del Río | Vigo

Entre unha aula de mozos e mozas e outra de estudantes sénior existe unha multitude de diferencias derivadas da idade, da motivación, da presión das cualificacións, etc. Por iso, para os docentes dos programas de maiores é de especial importancia coñecer as claves que lles permitan adaptar as clases ás características do alumnado. Este é o obxectivo da xornada de formación que este xoves se desenvolveu no campus de Vigo organizada ao abeiro do proxecto Erasmus+ Kipam, *Knowledge is Power, age ain't matter!!*, do que a Universidade de Vigo é entidade socia. Arredor de 40 profesores e profesoras do Programa para Maiores dos tres campus participaron en tres sesións que tiveron como obxectivo axudarlles a levar a cabo as súas clases, unha das premisas dos parceiros deste proxecto europeo. [+ info](#)




Este martes celebrouse o acto de benvida ao alumnado de intercambio

25 ESTUDANTES ESTRANXEIROS INCORPÓRANSE ESTE CUADRIMESTRE AO CAMPUS

Rosa Tedín | Ourense

Co segundo cuadrimestre xa en marcha o campus de Ourense celebrou este martes o acto de benvida ao alumnado estranxeiro que este cuadrimestre realizará estudos nalgún dos seus centros ao abeiro dalgunha das iniciativas de mobilidade internacional nas que participa a Universidade de Vigo. Trátase de 25 estudantes que, sumados aos 21 que estiveron no primeiro cuadrimestre e aos tres que están durante todo o curso, compoñen a faciana máis internacional das facultades e escolas do campus. [+ info](#)

10



Obtención de mostras de sedimentos

UNHA TESE ANALIZA O PAPEL DOS SEDIMENTOS DA RÍA NA ACUMULACIÓN E LIBERACIÓN DE METANO Á ATMOSFERA

D. Besadío | Vigo

Galicia posúe un dos ambientes litorais máis complexos da península ibérica e as peculiares características das súas rías, vales inundados fai aproximadamente 18.000 anos, espertan un grande interese científico, sendo obxecto de numerosos estudos. Neste contexto encádrase a tese de doutoramento de Alexandra María Ramírez, un estudo detallado dos campos de gas nos sedimentos da ría de Vigo que pon sobre a mesa unha realidade descoñecida ata o de agora e que suxire que a dinámica de oxidación-redución de sedimentos que conteñen gas metano non é tan simple como se pensaba ata o de agora, senón que existen ciclos máis complexos nos que elementos como o xofre. [+ info](#)

RÉCORD HISTÓRICO DE ALUMNADO ESTRANXEIRO NA UNIVERSIDADE CON 624 ESTUDANTES INTERNACIONAIS

Duvi | Xeral



Imaxe xeral do acto de benvida celebrado no campus de Vigo

624 estudantes internacionais completaran os seus estudos durante este curso 2017-2018 na Universidade de Vigo, o que supón un récord histórico de recepción de alumnado estranxeiro. Son 388 mozas e 236 mozos de 38 nacionalidades, maioritariamente europeos pero procedentes tamén de países como Estados Unidos, Arxentina, Australia, México, Corea do Sur ou Kazaxistán. Destes máis de 600 estudantes, 87 optaron por solicitar unha estadía anual nalgún dos tres campus da Universidade, 262 fixérono no primeiro cuadrimestre e 275 comezan estes días o segundo cuadrimestre. Onte martes déuselle a benvida aos que elixiron Ourense como destino e hoxe mércores os actos de recepción, nos que participaron responsables de diferentes servizos e oficinas, trasladáronse a Pontevedra e Vigo. [+ info](#)

UNIVERSIDADE DE VIGO

Unidade de Análisis e Programas.

Anexo a xerencia.

Planta Baixa.

36310 Vigo (Pontevedra)

986.818.689 986.818.640